

Б о с н а и Х е р ц е г о в и н а
БРЧКОДИСТРИКТ
БОСНЕ И ХЕРЦЕГОВИНЕ
СКУПШТИНА БРЧКОДИСТРИКТА

B o s n a i H e r c e g o v i n a
BRČKO DISTRIKT
BOSNE I HERCEGOVINE
SKUPŠTINA BRČKO DISTRIKTA

Na osnovu člana 23 stava 2 Statuta Brčko distrikta BiH («Službeni glasnik Brčko distrikta BiH», brojevi 1/00, 4/00, 7/04, 20/05 i 24/05) i člana 45 Poslovnika Skupštine Brčko distrikta BiH – prečišćeni tekst (“Sl. glasnik Brčko distrikta BiH”, broj 11/03), te Prijedloga odluke gradonačelnika broj: 01-014-009402/06 od 13. 07. 2006. godine, Skupština Brčko distrikta BiH na 35. sjednici održanoj 20. jula 2006. godine, donijela je

O D L U K U

O DRŽANJU PASA, REGISTRACIJI I NAČINU POSTUPANJA S NEUPISANIM, NAPUŠTENIM I IZGUBLJENIM PSIMA KAO I USLOVIMA ZA DRŽANJE PTICA

I. PREDMET

Član 1

Ovom odlukom reguliše se: način držanja pasa, registracija pasa u smislu njihovog držanja, način postupanja s neupisanim, napuštenim i izgubljenim psima, njihovo prikupljanje i smještaj u sklonište/azil za životinje, uslovi za držanje ptica u golubarnicama, kao i uslovi koje pravno ili fizičko lice mora ispunjavati za dodjelu javnog ovlaštenja za obavljanje registracije, prikupljanje i smještaj neregistrovanih, napuštenih i izgubljenih pasa.

II. DEFINICIJE POJMOVA

Član 2

Pojedini pojmovi iz ove odluke imaju slijedeće značenje:

1. »Odgajivači» su fizička ili pravna lica registrovana kod nadležnog organa za djelatnosti odgajanja pasa i podizanja mladunčadi pasa, koji tu djelatnost obavljaju u registrovanim objektima;
2. »Vlasnik držalac» je fizičko ili pravno lice koje je vlasnik psa što dokazuje izvršenom registracijom psa na svoje ime i koji faktički drži psa i vodi brigu o njemu s namjerom da se bavi uzgajanjem, zaštitom, druženjem, upotrebom, obučavanjem ili prodajom pasa;
3. »Pravno ili fizičko lice s javnim ovlaštenjem» je društvo, udruženje građana, firma ili pojedinac koji su registrovani da se bave sakupljanjem napuštenih i izgubljenih životinja i kojima je zakonom dodijeljeno javno ovlaštenje za registraciju pasa i prikupljanje neregistrovanih, napuštenih i izgubljenih pasa i drugih životinja;
4. »Neregistrovani psi» su psi koji nisu prijavljeni;
5. »Napušteni psi» su psi koji nisu pod kontrolom vlasnika držaoca;
6. »Izgubljeni psi» su psi koji nisu pod kontrolom vlasnika držaoca, a koje vlasnik držalac traži i ima namjeru da se o njima i dalje stara.

III. DRŽANJE PASA

Član 3

Dozvoljen broj pasa, koji imaju preko 4 mjeseca, koje vlasnici držaoci mogu držati u stanovima je dva, a u kućama tri psa.

Vlasnik držalac može podnijeti zahtjev Odjeljenju za javnu sigurnost Vlade Brčko distrikta BiH za dobivanje odobrenja za držanje većeg broja pasa od onog predviđenog stavom 1 ovog člana, ukoliko za to posjeduje uslove.

Pod uslovima za dobivanje odobrenja iz stava 2 ovog člana podrazumijevaju se, pored veterinarsko-sanitarnih uslova i vrsta pasa, i njihovo ponašanje. Ove uslove ispituje nadležna inspekcija i fizičko ili pravno lice sa javnim ovlaštenjem.

Odgajivači pasa koji drže veći broj pasa nego što je to predviđeno stavom 1 ovog člana, mogu držati pse u za to registrovanim objektima, a broj pasa koji mogu držati zavisi od veličine i uslova objekta u skladu s veterinarsko-sanitarnim propisima.

Član 4

Vlasnik držalac psa je dužan osigurati da pas ne ometa kućni red i mir trećih lica, te se pas mora držati na način da ne ugrožava ličnu sigurnost i imovinu trećih lica.

Član 5

Opasan pas mora biti držan u prostoru ili objektu iz kojeg ne može pobjeći, a na ulazu mora biti vidljivo istaknuto upozorenje «Opasan pas». Ulazna vrata moraju biti zaključana. Punoljetnom licu je izvođenje opasnog psa na javne površine dozvoljeno samo sa zaštitnom korpom i na povocu.

Ostali psi moraju se izvoditi na javne površine na povocu i vidno obilježenim privjeskom koji izdaje pravno ili fizičko lice s javnim ovlaštenjem.

Pod opasnim psom u smislu stavova 1 i 2 ovog člana podrazumijevaju se agresivni i ujedljivi psi.

Agresivnost i ujedljivost pasa procjenjuje sam vlasnik psa, na vlastitu odgovornost.

Član 6

Zabranjeno je izvoditi pse na javna mjesta kao što su državne kancelarije, zdravstvene ustanove, prodavnice, pijace, pozorišta i bioskopi, vjerske ustanove, groblja, javni prijevoz, kao i na javne skupove, svečanosti i priredbe, dječija igrališta, te ugostiteljske objekte na kojima je vidljivo istaknuta zabrana uvođenja pasa.

Zabrana iz stava 1 ovog člana ne odnosi se na pse vodiče slijepih lica kao i službene pse. Vlasnici držaoci pasa mogu pse pustiti bez povoca, da se slobodno kreću, na mjestima koja su za to određena i vidno obilježena.

Član 7

Zabranjeno je napuštanje psa, a u slučaju da se pas izgubi vlasnik držalac psa dužan je o tome obavijestiti pravno ili fizičko lice s javnim ovlaštenjem u roku od 24 sata od momenta njegovog nestanka.

Član 8

Vlasnik držalac psa dužan je nositi pribor za čišćenje psećih fekalija i čistiti površine koje služe kao zajednički dijelovi zgrada, stubište, ulazi u dvorište i javne površine, ako ih je njegov pas zagadio.

Član 9

Vlasnik koji drži psa u ograđenom dvorištu ili ograđenom prostoru zajedničkog dvorišta na vidljivo mjesto mora staviti oznaku koja upozorava na psa (oštar pas, čuvaj se psa i sl.) te imati ispravno zvono na ulaznim dvorišnim vratima. Ako je pas vezan u dvorištu lanac ne smije biti kraći od 3 (tri) metra i mora omogućavati psu horizontalno kretanje putem viseće

žice, a pseća kućica mora biti zaštićena od vlage i hladnoće i po veličini mora biti primjerena veličini psa.

Kada pas nije vezan lancem nego je smješten u boksu, površina boksa mora iznositi najmanje 3 m².

U neograđenom dvorištu pas mora biti vezan a u zajedničkim prostorijama zgrade pas se ne smije držati niti ostavljati.

IV. DRŽANJE PTICA

Član 10

Držanje golubova i drugih ptica, osim zaštićenih i ugroženih vrsta, dozvoljeno je u golubarnicima ili kavezima pod slijedećim uslovima:

1. Golubarnik mora biti zatvorenog tipa izgrađen od čvrstog materijala,
2. Ulaz u golubarnik kao i ispusti za golubove ne mogu biti okrenuti prema susjednim objektima,
3. Prozori ili svjetlarnici golubarnika okrenuti prema susjednom objektu moraju biti zatvoreni,
4. Golubarnik mora posjedovati poseban kanalizacioni odvod ili zatvoreni spremnik za odlaganje izmeta,
5. Golubarnik mora zadovoljavati i ostale opće veterinarsko-sanitarne uslove.

Ptice ne smiju biti puštene van golubarnika bez nadzora vlasnika ili lica koje je vlasnik angažovao za održavanje treninga.

V. REGISTRACIJA PASA

Član 11

Registracija pasa u smislu prijave za njihovo držanje je obavezna i vodi se radi kontrole populacije pasa, a nju vlasnik držalac psa obavlja kod pravnog ili fizičkog lica kojem je dodijeljeno javno ovlaštenje u roku od 7 dana od dana nabavke psa. Registracija pasa podrazumijeva unošenje podataka o vlasniku psa, mikročipovanju, nestanku psa odnosno njegovom brisanju iz evidencije.

Prilikom registracije pasa vlasnici držaoci pasa plaćaju godišnju taksu u iznosu od 5 KM koja se uplaćuje na račun budžeta Brčko distrikta BiH. Sredstva prikupljena od taksi koriste se isključivo za kontrolu populacije pasa.

VI. SAKUPLJANJE PASA I DRUGIH ŽIVOTINJA

Član 12

Neregistrovane, napuštene i izgubljene pse i druge životinje sakupljaju ovlašteni zaposlenici pravnog ili fizičkog lica s javnim ovlaštenjem uz upotrebu savremene opreme i na način da životinji ne nanose bol ili ukoliko je to nužno, da ga nanose u najmanjoj mogućoj mjeri, i smještaju ih u sklonište/azil za životinje na području Brčko distrikta BiH.

Član 13

Pravno ili fizičko lice s javnim ovlaštenjem može na zahtjev vlasnika preuzeti i smjestiti u sklonište/azil i životinju o kojoj vlasnik ne može da se brine.

U slučaju iz stava 1 ovog člana, vlasnik životinje mora, pored ličnih podataka, dati i izjavu kojom se odriče vlasništva nad životinjom, te predati svu dokumentaciju o životinji.

VII. PRAVNO ILI FIZIČKO LICE S JAVNIM OVLAŠTENJEM

Član 14

Postupak odabira pravnog ili fizičkog lica radi dodjele javnog ovlaštenja vrši se putem javnog oglasa koji raspisuje gradonačelnik Brčko distrikta BiH u roku od 30 dana od dana donošenja ove odluke.

Javno ovlaštenje iz stava 1 ovog člana, dodjeljuje se zakonom.

Član 15

Pravno ili fizičko lice da bi dobilo javno ovlaštenje mora ispunjavati opće i posebne uslove:

1. Opći uslovi:

- a) da je registrovano za obavljanje djelatnosti zaštite životinja kod nadležnog organa;
- b) da ima sjedište/prebivalište u BiH;
- c) da se protiv njega ne vodi krivični postupak ili prekršajni postupak koji je u vezi s obavljanjem djelatnosti zaštite životinja.

2. Posebni uslovi:

- a) da posjeduje registrovan objekat za zbrinjavanje pasa;
- b) da posjeduje savremenu opremu za hvatanje pasa, mačaka i drugih životinja (mreža, transportni kavezi, zamke, i sl. a za divlje i agresivne životinje: pištolji, puške i duhaljke za omamljivanje);
- c) da je osposobljen za vođenje baze podataka o psima i vlasnicima držaocima pasa.

VIII. KAZNENE ODREDBE

Član 16

Novčanom kaznom u iznosu od 100,00 do 1.000,00 konvertibilnih maraka kaznit će se za prekršaj vlasnik držalac životinja:

1. Ako opasnog psa ne drži u prostoru ili objektu ili ga izvodi na javne površine bez zaštitne korpe i podvoca na način predviđen članom 5 stavovima 1 i 2 ove odluke;
2. Ako drži psa na način koji ugrožava ličnu sigurnost i imovinu građana (član 4);
3. Ako napusti psa ili ne prijavi izgubljenog psa (član 7).

Član 17

Novčanom kaznom na licu mjesta (mandatnom kaznom) u iznosu od 50,00 konvertibilnih maraka, kaznit će se vlasnik držalac životinja za prekršaj:

1. Ako drži veći broj pasa od broja predviđenog članom 3 odluke;
2. Ako njegov pas ometa kućni red i mir trećih lica (član 4);
3. Ako izvodi psa na javna mjesta iz člana 6 odluke;
4. Ako ne čisti površine koje je njegov pas zagadio (član 8);
5. Ako ne drži psa u ograđenom dvorištu ili prostoru uz istaknutu oznaku kojom upozorava na psa ili u neograđenom dvorištu ne drži psa vezanog ili drži psa u zajedničkim prostorijama zgrade (član 9);

6. Ako drži golubove i druge ptice u golubarniku koji ne ispunjava uslove iz člana 10 odluke;
7. Ako ne izvrši registraciju psa u smislu člana 11 odluke.

IX. NADZOR

Član 18

Inspeksijski nadzor nad provođenjem ove odluke utvrdit će gradonačelnik Brčko distrikta BiH posebnim aktom.

X. PRIJELAZNE I ZAVRŠNE ODREDBE

Član 19

Primjena kaznenih odredbi iz članova 16 i 17 ove odluke započinje 90 (devedeset) dana po stupanju na snagu ove odluke.

U periodu od stupanja na snagu ove odluke do početka primjene kaznenih odredbi gradonačelnik Brčko distrikta BiH će organizovati javnu kampanju radi upoznavanja građanstva sa sadržajem ove odluke.

Član 20

Ova odluka stupa na snagu danom donošenja i objavit će se u "Službenom glasniku Brčko distrikta BiH".

Broj: 0-02-022-106/06
Brčko, 20. juli 2006. godine

PREDSJEDNIK
SKUPŠTINE BRČKO DISTRIKTA BiH

Prof. dr. Milan Tomić

DOSTAVLJENO:

1. Gradonačelniku;
2. Predsjedniku Skupštine;
3. Potpredsjedniku Skupštine;
4. Šefu Odjeljenja za poljoprivredu;
5. Šefu Odjeljenja za javnu sigurnost;
6. Šefu Odjeljenja za komunalne poslove;
7. Pravnoj službi;
8. Arhivi.